

1 Pita

Memba Mimirini Tombaiva, Pita Novol Venam, Pepeisha Vewolalm Kristusnindm, Nomba Temba Kinmba Iangavnamba.

1 ¹Kava Pita, mongo moalamangnindrini Yesus Kristusna. Hindm, nom Sesoa ten kiki vewol venam hevelm, ten ye eungu vevm os no provinsra, no provinsra, Pontusra, Galesiara, Kapatosiara, Asiara, eva Bitiniara.

Yimba Kristustindi, noinda yimba pevmba os nungeilv, kava ahalakohol indhanamsna av puehlnindhovra. ²Sesoava aral doara heva doa kiki vewol vena yemba, kekaiv velmba hevna nowolnamba. Yemba kekaiv velmba hevelmba, hevsongol andra vevandungu vinvna yeindava. Sesoava ninginvna yemba, engalm hev, wo alm besal windelangas. Honamba si wohvevav, noinda Yesus Kristusmba dahana, hena tovol yena indkoklamba poswol vinna. Sesoaoa yemoa undalm vewol vevra, wo yeoa osoa noindaoa besal undwonam avm. Honaoa ambo lotholohvra osangas kivrahui.

Pinamba Vuhe Besalva Leleng Veleluhunv Senakembella.

³Pioa okulira Sesoam aram pivna mendeklinam Yesus Kristusnam. Sesoava wulav mendekli wavrava, wo noinda hena wavrava himba pimba daswolna, nemelundnam alm. Himba daswolna pimba, nengviluwuvulm, sewonam vuhem besalm vralm, manara noinda Yesus Kristusva phona pokamarini. ⁴Wo daipotava pivva ningv, vuhebesalm, nom Sesoa si daswolvavm hevtindim. Wo nomba vuhemba hev ieinv pimba di sena mendah. Honamba vuhemba si indkokla vepevavmoa, huhmohva hevnamba si mueisowa vepevavmoa. ⁵Yimba pevna undnahonam

amnavpa Kristusmba, wo noinda Sesoana keknasowolva pelkethaluhunv yemba. Himba yemba nembalm vev hengam vuhebesallam, wo honamba nonam muserava si pulpulvovav, nonamba ovi pethai imhara evhowolvram. Wo manimani si beswonamangas lohpravra.

⁶Honinda yimba undva lothoprav. Eva mani owaima, dihi ten kinmba snal snal prungu vev, maim ata yenamba noinda undva potrava pipiha vinvav espetava. ⁷Nomba kinmba si prungu vevra, yenam undnahonam alm, wiki vewol vinilm, osm ora, lehra keknam undnahonam av. Sna undnahonamba mendeklinonoa, kuvhoav golmba henga. Golva liheiv suwera, osmba ora golnonoa. Golva si indkokla vilovav, heva os yenamba undnahonamba almba si wohluhunvra yunalmb, wo nonamba Yesus Kristusva si hengava provrava, hovrahovram lohvhoolm, si yemba mindnam indk vethinvav, wo yemba okolawol vevra, wo yenamba nihilva iovungeinvra mindnam. ⁸Yimba nunglinamoava Kristusmba, heva os yunalmb yimba undviv hembra. Yimba daipotava si hembra nunglivavmoa, heva os yimba undnahonam amnav keknam hembra. Noinda yemba doa pilivhoawol vilona, undmba lothopralva nomba, osmba owai, si ishuvramoa. Wo yenamba undmba lothopralva kuvhoawol vinv manimani hona petharinimba. ⁹Manara noinda Sesoava yemba lopshav, noinda yimba undnahonam amnavnam Kristusm. Membra plalva, osm yimba Kristusm undnahonam amnavnam.

¹⁰Moashulnindva himba kelna aslaln hona moana plalmba, membra Sesoava pimba lopshavpa, noinda himba doara honamba eishovna, Sesoana besal wavramba, nom ten prunvm yem. ¹¹Kristussongova otuhtowol vevna moashulnindm. Wo himba hembra sihengu vivna, moam isholm, osva nihsesoava Kristusva si guavavpa, wo sismba himba si mendekli nihilva vravav. Moashulnindva levrapiivolalm vivna, osm manam Sesoasongolva nithinna hembra? Himba aongsram alm vevna, osm henanam si nomba manimani phovav?, wo snal si lohvvav pethava nonamba? ¹²Heva os Sesoava nithinna hembra, osm nomba temba himba ishuvnamba, si hevna novrava nomba phunvavmoa. Moashulnindva doara os ishunna, osm Sesoava si yemba lopshavav. Wo indhanamba himba nomba ishuvnamba besalnemelmomba yemba, himba yemba temba ishuvna nomba moashulnindna moam. Himba nomba temba vivna Sesoasongolnapopol, hembra temba wolamb venam senakembellini. Hena moamba besalangas, wo eva ovsongolnindva himba levrapiivolalm vivnata, nom manimani besalm, membra Sesoava yemba vinnamba.

Sesoava Kekaiv Vev Pimba, Alm Hevelm.

¹³Wo noinda yeoa pevmoa kokolma vildavm, es kava amanamana vev, andra viv. Yeoa keknam undnahonam avm, nengviluwvum nom wavram, ten Sesoa yem si daswolvavm, nonam Yesus Kristus henga provavm.

Himba yemba si os awothowol vevav. ¹⁴Wo noinda osva manam yimba avra, osva pevpa temba nemetva avnamba, owai. Nemetva doarava yimba levrapivolnamoa, wo yimba vivna sahoklal manimani, yimba velmba ningvnamba. Wo heva os daipotava yimba Sesoana ombtowondal, yeoa engivm. ¹⁵Yeoa besal windelangas avm, andra vinivm, os ten Sesoa hev besal windelangas avm. Manara Sesoava memba, yemba kekaiv vev hevelm. ¹⁶Noinda novol velohv Sesoana tombaimorava os,
 Yeoa besal windelangas avm, noinda kavpa kava besal windelangas lohv. *Wok Pris 11:44-45*

¹⁷Yimba sembayang viniv Sesoam, wo alv os, ara. Wo hona aramba lesvhoawol vevmoa indakondava indhanana andramba, himba wohlehra vethav lohohra. Wo noinda osva dawonamba huiva yimba memba avpa hona petharava, yeoa avm, nona longong vrelm Sesoam. ¹⁸Yimba nonora av, osva nemetva doarava yimba avna humeinwevsana. Yimba sovavrinvna nomba wevsava no indhanana, ten doara yenisra einnam. Heva os yemba lopshavavmoa no wevsava. Heva os Sesoava doa yemba kilumbshuawol vena, eva himba doa yemba muehrombol vena, no wevsakoklanamba almba. Yemba doa kilumbshuawol vena, heva os nonamba owai, temba nomnapolmoava, snamba golnaka, besinaka. ¹⁹Owai, yemba kilumbshuawol vena Kristusna tovolna dahalna, himba snal hoaivalhui sipsip otolna nihna, mongova nihsowosalva shalohmananamoa, os ten Yutanind vewol vivnam sembayangdam.

²⁰Pethamba Sesoava os vena, doara Kristusmba kikih vrena, honamba andramba velmba. Wo heva os doa himba daipotava ambara vilindthueinna pim pethanindmba, hona ovi pethai imhara evhowolvram. Memba yem kolvrowolalm. ²¹Wo noinda yimba Sesoamba undnahonamba amnav Kristusnana, nengviluwuv, himba si yemba daswolvav vuhemba besalva. Sesoava wolaihaphona Kristusmba pokamarini, wo vraohna mendekli nihilva. Wo noinda yenamba undnahonamba almba nengavnangva luhunv Sesoaindangas.

²²Daipotava doa yimba pevmba dendalalmangas weihaloh vreprana, mana vema kethahui. Manara, yimba wohengivpa moanonoam. Daipotava yimba doa und vewol viv pevna mongawa Kristusnindm. Undnahonam und vewol vivm monglamoa pevna undnahonam. ²³Yemba doa nilhawol vena henga otol nemelalm. Honamba nemelva undva provmoa nominiva, temba mueisowa vewol vevpa, heva os nomini, ten os owai, es eva mueisowa vevav. Yimba doa otol nemelalm av henga Sesoana hevna moana, noi yunalm osangas wohlohvavm. ²⁴⁻²⁵Sesoana tombaimomba os ona,

Indkumbiva indhanamba ilmsna av. Wo huhmohva henamba bungana kulmsna luhungu vivv osorinimsna. Wo tilva soulaiva,

kulva lilvihev. Wo heva os moamba mendeklinamba si wohlohvav osangas yunalm. *Aisaia 40:6-8*

Wo memba moamba besalnemelmoo, nona yemba numhowol vivnam.

2 ¹Wo noinda osva wohkelvapingivm manam manam sahoklalmoa, eva moakokomomoa. Manam yimba anilhamana vevra, osva ovra, kava indhana windel, owai. Manam yimba nengavnangkoklava pevna mongawa Kristusnindmba vivra, hembra moakoklanamba eishunvra. Honamoa wohpinganga vivm pevnaminioa. ²Os mendahal otol ten tetm vevm, yeoa os ningvm Sesoana moam, mana vemava sahoklalva kethalohvmoa noindava. Honanangas yimba phovrava, wohavav yunalmba. ³Manara, yimba doa pev lihna, wo yimba uv, mendekliva hevnm besalangas.

Yesusva Honmsna Wohav.

⁴Mendekliva Yesusva honmsna av, sna hon, ten deuvandranind huhul vewol vivm, nonam deuvnm velm. Wo heva os indhanamba annind annind pethanindva indkumbiva ningminivmoa hona honmba. Wo heva os himba honmba, noi Sesoava doara hev ten kikih vrenam, hevna deuvnm velm. Sesoamba wohkanandhana heindava mindnam. Wo noinda yeoa osoa hemoa wohlipethamno, manara, himba undna av. ⁵Wo eva yimba snalta hon, ten undna avm. Wo yimba Kristusmba lipethamnavrava, osrava Sesoava yemba hevna deuvmsnamba moakot velm vev. Hev si vevav hevsongolnapopol, wo noinda yimba si avav sembayang andranindilmsna hevelm. Wo yimba osva si pevmba wohwerombroh vivra Sesoamba, os ten nemet innena tatana suwera singminivnam. Yimba honamba vivra Yesus Kristusnapopol, wo Sesoava si indlothovra. ⁶Manara, Sesoana tombaimorava os lohv,

Hillu, kava si velahavav honmba Yerusalemrava. Wo nomba si mandkhnonoa besal, Sesoava hev kikih vrenam. Beswonam vilailka vevra, osva honmba monglava beswonam velahola velohvra no honsrava. Hona honmba olhv indhanarinim mongom. Wo indhanamba keknamba amnavrava hembra, hembra si louva vinvramo, Sesoana levshoawolallava. *Aisaia 28:16*

⁷Honamba honmba Kristus, wo himba hevnm mendeklinonoa yemba nomba, yimba temba hembra keknamba undnahonamba amnavpa. Wo heva os no indhanamba, temba himba nomba undnahonamba amba owai vivrava,

Himba honmba, noi temba snal, andranindva und vivnamoa hembra. Heva os Sesoava hembra doa vilundthoana hovmundililmsna.

Buk Song 118:22

⁸Mongova moamba eva snata lohv,

Himba honmba, nomba doa kelvhueinna monamba. Himba honmba nomba, osm noinda hembra vetekeverel vavovra. *Aisaia 8:14-15*

Himba noinda saha vruwuvra, noinda himba owai, engivnamoa, Sesoava nomba ovnamba. Osm Sesoava ninginv, vinilmba hembra.

⁹Heva os yemba doa kikih vewol vena, wo yimba hevtindilm av. Himba yena king kuwulalm einv, wo yimba hena sembayang andranindilmsna amnav. Yimba besal indhanangas wohav. Yimba hona indhanamba av Sesoanangas. Sesoava yemba kikih vewol vena, osm yimba hevna moamba besal si wulvahmana vinivav, nom manimani besal hevm, hev ten venam. Manara, himba yemba velarombol vena sikulmerini, hevna pusambanakambaram alm. ¹⁰Doarava yimba avnamoa Sesoatindilmba. Wo heva os daipotava yimba doa av hetindilm. Doarava owai, Sesoava yemba wavra vovhueinnamoa, mendah. Heva os daipotava himba doa yemba wavrava vovhueinna.

Yeo Amno Sesoamangas.

¹¹Kana seh, yimba Sesoatindi av, wo noinda hona pethanindna novrava, yimba snal av, oi shepuina ehalmini, wo yimba ambo av ahalakohol indhanamsna hona petharava. Wo noinda osva kava yemba ishuny, ehalla vivm, mana vemakoklanapenamoa, nomba nihva pevnamba temba muemb nevrava, velmba. Honamba ata daos uhunvra yena undmongova. Wo yenamba undnahonamba almba si vikoko vilunvav. ¹²Indhanamba nomba temba undnahonamba amba owai vivpa, wo eungu vinvpa mumrava yeindava. Himba yemba si os unvra, yimba sahonam viv. Aembu, beswonam avm. Wo himba si nunglivra besalva manimani, yimba vivrava, wo himba yunam si okulivav Sesoamba, nonamba himba hengava si provrava, lesvhowolalmba.

Pioa Alohra Indkumbi Kuwulna Anglasingi.

¹³Mongawa aongna einvm, henomoa temba mendekliva indhanamba eungu vevpa hona petharava vavawonamba. Vinivm honaoa Sesoam. Mongawa aongna hilwulvm king kuwulm, he mongal kuwulva wulluhv mendekliva petharava. ¹⁴Wo eva hilwulvm kuwul indhanamoa nomoa, temba wolamb vevnamba king kuwulva. Hembra wolamb vevna, bui vewolalm, nom ten hev sahonam vildavnam, eva okolawol velm, nom ten beswonam vivnam. ¹⁵Wo noinda osva, yimba temba nonamba beswonamba viwul vevpa, nona yimba ollawol vilangavav indhanam nom nengavnangkoklanam, osnapenam, ata homeis yem eishunvm plalhuimom. Men honam Sesoava keknamba mindnamba nengv.

¹⁶Yimba indhanana lohohmosingiva avmoa. Wo heva os beswonamba almba pevnamba, manam yimba novtoholmba dasalmba vivra, nonamba sahonamba velmba. Ao osalm, ora andranind Sesoana. ¹⁷Longong vewol vivm indkumbimoa. Und avramana veo pevna mongawa Sesoatindimoa, ovna, pevna mongawa moshriini. Longong vrvim Sesoamoa pepehnahonam. Longong vrvim king kuwulmoa.

**Pioa Kristusna Wevsam Engalvohra, Manimani
Os Wohvivra, He Ten Venam.**

¹⁸Yimba ombandhana andranind, yeoa eungu vinvm keusingi pevna kuwulindaoa. Wo mongawamona hilwulvrava, longong vewol vivm. Yeoa kuwulmoa hilwulvm nomoa, ovra, memba besal lehrangas, wo eva yeoa hilwulvm nomoa, ovra, memba honamba kuwulva sahoklal. ¹⁹Mongova indhanariniva kinmba nisva guatava, osva owai, himba mana vemava sahonamba venamoa, wo heva os himba nengmanatava Sesoamba, wo nomba kinmba guavra, osrava honindava Sesoava indk vethavra. ²⁰Yemba helvetava, noindava temba pevpa sahonamba vivnamba, noindava owai, plalva lohmanavmoa, yemba voatan ovrelmba, osra guana kinmba. Heva os yimba kinmba guatava, noindava temba pevpa beswonamba vivnamba, wo yimba beswonamba guatava, wo Sesoava noindava indk vethavav.

²¹Nomba temba honamba kinmba, Sesoava yemba kekaiv vena. Kristusva kinmba gueinna yem. Himba hevmba wuhholothunna yemba, osm ora, os heoa vira. Wo yeoa os wohvivm, hena dandm wohengivm.

²²Os novol velohv,

Himba mana vemava sahonamba mongova venamoa, himba moangakalava ovnamoa.

Aisai 53:9

²³Nonamba indhanamba hembra moakoklanamba eishomnavnamba, himba hembra sesmba unnamoa moakoklanamba, owai. Nonamba himba kinmba guavnamba, himba indkokla vewol velmba unvnamoa esesmba. Heva os himba hevmba aralna englisra wuhholothona, kolvralmba hevmba. Sesoava noi, hengas indhanam manam manam lesvhoawol vevpa beswonamangasva. ²⁴Kristusmba dahana krusera, wo hevna nihsesoana himba pimba kilumb shuawol vena pivna indkoklariniva. Himba honamba memba osm vena, pioa doa wuleihalohra, Sesoam indkokla vrelmoa, dendal alohra. Osm lehna, himba pimba sishona vewol vinna hevna wosavana. ²⁵Yimba sipsipmsna avna, snal ten bukithangavm monakoklam. Wo heva os daipotava yimba doa prapiana Kristusindam, wo hev atelalm luhunv yem, wo kekalvho vewol vinv yemba.

Moamba Honamba Memba Tendona Onganam, Nom Ten Evrowolvm.

3 ¹Ambo osangasta, yeoa ungevlioa manam manam wohahalunvm pevna tlahumunpevnamoa. Wo verava, ora monglava tlahumunpevpa ahalomba owai vetava Sesoana moamba, himba yenam nungeilinvra hevna ongahumunilnam wevsam besalmba. Yimba owai, ishunvramoa hembra moamba. Himba si ambo hev mendeklim engivra. Maim oi, doa hembra kevrulkai. ²Yenamba tlahumunpevpa si yemba

nungeilinvav, dendalngas, mana vema kethawolhui, os ten pev avm hevmongo longongnahonam. ³Yimba manam ambaratovrava pevmba nesmos vewol vivra huhmoh besalnamba. Honanamba, tam niswolalm, golmusungnamba, pikian besalnamba. ⁴Owai, yena besaloa wevsaoa phunvra pevna undmerini, moaivrawonam ishohm, eva indwonam alm. Memba besal undnonoa, wo owai, si es eva hoai vevav, wo hevme mendeklinonoa lohv Sesoana novrava.

⁵Ungevoli snal ten nemet engivnam Sesoamangas, wo himba Sesoam nengviluwuvna, nom ten Sesoa hev moa ishunnam. Himba ahalunvna manam manam hevna tlahumunilnamba, wo hona monana himba nesmos avramana vevna hevmba. ⁶Sarava wohhellevna hevna tlamba Aprehamba, wo sevra orevna, os, mendekli. Wo yimba ungevliva tanam wohavav Sarana towandmsna, yimba tanamba vivrava, osva membalehra pepehhuiva.

⁷Wo eva osta yeoa tlahumuniloa os wulavm pevna onghumunpevmoa hona besal monam. Yeoa hemoa beswonam longong vewol vivm. Himba snamba owai, membayimba tendomba vilovpa. Heva os Sesoava eva hembawoathowol vevta, lopshawol velm, nona hevna wavrana, wo himba si yunalm wohavav. Vivm honamoava, osm Sesoava si hillinvra yena sembayangmba.

Elsus Yeoa Beswonamangas Longong Vewol Vivm Indhanamoava.

⁸Hillu, honamba moamba kava ishohpialm vev. Yeoa indkumbioava avm mongawulm mongawundna. Beswonam keknam ahalovm monglamoa. Undnahonam und vewol vivm monglamoa pevna towandaslapovmsna. Yeoa wavra vewol vivm, eva manam yimba kelsombovho vivra. ⁹Manam yimba vinivra sahonamba indhanarinimba esesmba nonawusrava, temba himba vinvra. Manam yimba moakoklanamba koasromb vivra hembanawusrava, temba himba unvra yemba. Heva os seihminivm Sesoam, osm awoathora no indhanarinimoava. Vivm honamoava, noinda Sesoava doa yemba kekaiv vena, osm velm. Wo himba si os yemba awoathowol vevra. ¹⁰Sesoana doaramini tombaimorava os novol velohv, Indhanarinioava vevra honangas, osm himba beswonamangas amana vevra yunalm osangas. Men elohvm sambla, himba moakoklava ishovramoava sahoaklala, eva himba moangakalamomba dasalmba ishovramoava. ¹¹Heoava wohwuleihavra, sahonamba velmba, beswonamangas vevra. Heoava aslavra, mongawundnam alm owalmongom. ¹²Manara, mendekliva nongalv besal indhanamangas. Himba aongva lelaheinv hena sembayangdamba. Wo heva os mendekliva vreipra vewol vev, nomba temba himba sahonamba vivpa.

Buk Song 34:12-16

¹³Yimba elsusva beswonamangasmba velmba tanamba vevrava, owai, mongova indhanariniva yemba si indkokla vrevavmoa. ¹⁴Heva os yimba kinmba guatava no besal wevsarava, eva nomba temba osva vevra, yemba os ata awothovra. Manam yimba pemba vivra mana vemarava, himba temba yemba dasalmba pepeh vewol ovivrava. Manam undva yenamba honindava potrava pipiha vinvra. ¹⁵Heva os longong vrvim Kristusm, wo umnivm hemoa, os mendekli, pevna undnahonam. Elsusoa yeoa plasra ambo avm, eishunilm indkumbimoa, himba nomba yemba sahovol vevrava, noi und, ten pev keknam ilvahmanavm Kristusm. ¹⁶Wo heva os wondewonam ambo eishunvm, eva longongmona. Elsusoa yeoa pevmoa os naengho vrowol vivm, kava lehrangas viv. Wo himba nomba temba eishunvrava sahonamba, hona wevsamba, memba pevpa amnavpa Kristusmba, si lou vinvav hembra. ¹⁷Sesoava osva nengallava, pivva si nihsesoava dumbvra, no wevsarava, temba pimba beswonamba vivnamba, eva homeista. Wo heva os pimba nihsesoava dumbtava, no wevsarava, temba pimba sahonamba vivnamba, owainonoa, temba sahoklalnonoa.

¹⁸Kristusmba daheinna yemba mongawulm. Wo noi hena dahal yemba doa kilumbshuawol vena. Himba indhanarini windelnonoa, heva os hembra daheinna, nom ten hevna indkoklanahonam avnam. Himba honamba osm vena, wongalm yem hevna aralindam. Hembra helvakomandhina, heva os henamba undva hevsongolnapopol phona. ¹⁹Hevsongolva henamba ganamba, ishunvna indhanasongom buimera, di ten nengviluwvm Sesoana lesvhoawolalm. ²⁰Noi indhanasongova himba Sesoana moamba pilpikovvna nemetva, nonamba Noana novrava. Heva os Sesoava lilnamba hembra indkokla vewol venamo, Sesoava nengvewolavna no sahoklarava hembra, nonamba Noava mendahva botva kueindvnamba. Wo doa ambo eskand indhanamba 8pelara hembra nowana, botmerini pueumbriniva. ²¹Nomba pomba snal, ona, posvandpo, noi men daipota yem lopshavm. Nomba owai, temba nihvuhinpmba ahalvpa nonamba. Noi, ye ten os Sesoam wohumnivm pevna undnahonam, kava si indhanawindel avav. Wo honamba memba, noinda Yesus Kristusva phona henga pokamariniva. ²²Daipotava doa Yesusva sihavongo vena senakembellam, wo avhoana Sesoana nihanasis. He wulluhv moalamangva mendekliva, wo eva he kuwulva wulluhunv indkumbim ovsongolnindnam, wo osoa eva tihsongom, nom himba eva keknasowol avnata.

Wei haloh Vreparava Pevm, Os Ao.

4 ¹Kristusva guana nihsesoava. Wo eva yeoa pevmoa wei haloh vewol vivmta, os ningminivra nom, Kristus ten venam. Indhanariniva himba nomba nihsesoava guavrava, himba hengava nengvmoa,

indkoklanahonamba almba. ²Weihaloh vewol vivm pevm, osm si yimba doaramini undkoklava nombolvhueivra, nonamba avrava huiva petharava, wo vivra nongas, ten Sesoa und nengvram, nomba vivramoa mana vemakoklava, temba indhanamba ningvrava.

³Nemet doara doa yemba wohindkokla vilona, nona ten puehalnind amnavnam. Yimba nom vivna, goariskuum, eva mana vemakoklam, undm phomnalm. Ye vevna, daipm ololangvna, noindam dai olm, tihm lohawolm elsum. Eva ye vevna, sembayang vilenginvm tihsongom, nomba Sesoava wohovovna. ⁴Wo heva os daipotava owai, wo noinda puehalnindva osva ningv, temba indanapetam, osva yimba temba owai viv, hengava lelnamba angalmba, manam manam sahoklalmba velmba, osva himba temba vivpa. Wo himba vivpa, yemba moakoklana tandwol viv. ⁵Wo heva os himba yunam si wohishupieimnivav, nomba temba himba vivnamba. Himba wohishupieimnivav temura Sesoamba, he lesvhoawolalmba lohv, men avm, eva ten sihanam. ⁶Tanam hembra sihana, osta eva pivva indkoklava vivpa, wo pimba saivv. Heva os hembra besalnemelmona numhowol vine, osm hesongoloa undna ara, os Sesoa ten hev avm.

**Yea Beswonamangas Popeng Vewol Vivm Sesoana Andramoa,
Nooa Temba Hevpa Yemba Nonamba Daswolnamba.**

⁷Doa mumra vev, manam manam wohmueisowa velmba. Noinda yena nowoloa lingilliheiprinvra, wo pevm beswonam avramana vevm. Wo osva yimba beswonam sembayangmba vivra. ⁸Men mendeklinonoava, keknam mindnam undnahonam und vewol vivm pevna mongawa Kristusnindmba. Und vewolalna lohv monamba, nomba osmba ningvavmoa hevna indkoklamba hengava. ⁹Yenaoa tuvoa ambo velaihaluhginvra henom henom, moahui.

¹⁰Yemba indakonda doa wohsingthana Sesoana andranamba. Sesoava doa novpa wuleihinna hevna besal und vewolalmba, daswolalmba yemba snanovna snanovna hevna andrava. Wo yimba andranindmsna, osm yena andra luhunv, Sesoana undnamba andra velmba. Wo noinda osva avm besal andranindilm, wo vivm no besal undna, pevna mongawa Kristusnindmoa nona nesmos vewolalm. ¹¹Himba nomba andrava vravrava, isholmba moamba, heoa ishovra moaoa Sesoanamingangas. Indhanariniva himba nomba akolvra vevrava, heoa nona akol vevra, ten Sesoa daswolnam hevml kel. Yea honi vivm, osm manara manara indhanamba si Sesoamba okulivav Yesus Kristusna nihilla. Heindava manimani keknamangas wohlohvav si osm yunalm yunalm, wo indhanamba okulivra. Tanam.

**Pioa Indk Vethalohra, Kinmoa Ianga Velmoa,
Osva Temba Kristusva Guanamba.**

¹²Seh, manam yimba novpa viludakaka vevav nihsesoakoklarava, yimba memba daipotava kinmba lopsho vewol vivpa. Memba honamba,

Sesoava simbeihawol vinv, yena undnahonam keknam alm. Wo noinda osva manam yimba osva ningvra, mani hevpa snamba kamba nongalphov? ¹³Heva os yeoa indk vethapro, noinda Sesoava doa yemba daswolna kinmba Kristusnamsna. Yimba si wohindk vethappravav, nonamba hengava Kristusva provrava hevna pusambanakambarava. ¹⁴Yemba indhanamba sahamonamba eishunvrava, noindava yimba temba engivnamba Kristusmba, doa yeoa indk vethapro. Manara noinda yimba osva os ningvav, nihilva mendekli Sesoasongolnamba, Sesoasongolva yemba wonvev nihra.

¹⁵Manam yimba kinmba helvakomoriniva ianga vevra, yukovriniva, eva mana vemariviva mongova, owai, noinda yimba kinmba deiswilvrava monglam indhanam. ¹⁶Heva os yimba kinmba guatava, noindava yimba Kristusnindriniva, manam yimba louva vivav. Yeoa okulivm Sesoam, noinda yimba doa solthoaprana no nihilna.

¹⁷Doa mura vev lesvhoawolalmba, si seilmba hevm Sesoatindimsna vinvra. Wo nomba lesvhoawolalva pimsnamba vintava, nomba si es vinvav indhanamba, temba engmba owai vivpa besal nemelmomba Sesoanamba? Os novol velohv,

¹⁸Owai, es eva Sesoava si besal indhanamba lopshavav? Wo vei, sna indhana, henoi ten ahnam Sesoamongo lovahwolv, eva indhanakokla, tanamolnam si hembra aiv suwera indkokla vilowovav.

Sindaun 11:31

¹⁹Wo noinda osva, nomba temba kinmba lopsho vewol vivpa, noindava Sesoava temba undva ninginvpa, osmba velmba, heoa hevmoa Sesoana englisra sendhira. Wo heoa osoa wohvivra nooa manimani besalao. Sesoav he v hembra vewol vena, himba si kolvrowol vevav, noinda himba elsus wohengwol vev, nomba himba hevpa temba wohunvnamba.

Yimba Sipsiptindimsna Sesoana.

5 ¹Daipotava kava mana vemam isholm vinv yem kuwulm, hindtindinam, hindtindinam sembayangnindm. Wo kavpa kava eva kuwul lohvt. Kava kavpa doa kavna novna nonglana Kristusna kinmba. Wo kava si wonvravav yemba hena pusambanakambara, nonam pim nithinvram. Kava eiswol vev yemba, ²osm beswonam vewol viu Sesoana sipsiptindim, hevtindim, pev ten kuwul ilvahinv. Kekalvho vewol vinv, noinda yimba pev ningv, owai, noindava osva yemba ambo nengnam wuhtv, velmba. Osmta Sesoava undva vrev. Vivm, noinda yimba indk vithiv, akol velmba, owai, noindava yimba undva vrvina diandram. ³Manam yimba kuwulva ilvahinvav, sahonamba dakonda vewol velmba, owai, pevpa temba kuwulva hembra ilvahinvpa. Yeoa wevsa besalm engu, wo himba ata nom nunglivrava, os engivra. ⁴Wo

nonamba Kristusva kuwulva sipsipna kekalvhonindnamba prunvrava, yimba si topi moainal weilverombol vivav. Memba osm, yimba doa kuvhoai Sesoana vuhemba. Nomba topiva Sesoana, wo si es eva mueisowa vevav henamba huhmohva.

⁵Mongawamoa, tendotowond yeoa keusingi ambo taivwonam lovahinvm mundilinda. Wo yeoa indkumbioa pevmoa ahalovm. Manara, Sesoava vreipra vewol vev henomba, hevmba temba wivewol vivpa, heva os himba wavra vovhueinv no indhanamba, himba nomba temba ahalovpa owalmba. *Sindaun 3:34*

⁶Wo noinda osoa avm anglasingi Sesoana mendeklina englisra. Wo he si yena nihilva mendekliva awothowol vinvav, nonamba nambainonoava provrava. ⁷Dambroh vivm pevna duusoa hem, noinda himba yemba novna vewol vev.

⁸Yeo novkalana avm. Noinda Setanmba yenamba unguindrini luhunv. Wo himba lohmana vev, os maim oi, laion wunuhona lohmana ovov, winelm indhanarinim mongom. ⁹Yeo keknam avm pevna undnahonam, wo Setanmoa lipingivm. Yimba nonora einv hembra, osmba yenamba pevnamba mongawa Kristusnindva annind annind vavawonamba petharava kinmba mongal vriv, snal ye men wuleivvm.

¹⁰Tanam yimba kinmba levreiv, heva os ambo snakand, tokwonamba owai. Wo heva os sismba nonamba, Sesoava si manam manam beswonamangas wohvevav. Himba si yemba akol vevav, alm keknamangas. Himba si yemba meisra mungpavsalm luhunvra, osm ata homeis yem plel vevm. Himba Sesoa, hengas wavrava vovhueinv. He yemba doara kekaiv vena, akolvra velmba hevna pusambanakambara Kristusindava. Nomba pusambava si yunalmsangas wohlohvav.

¹¹Manimani henapopol henangas yunalmsangas. Tanamta.

Pitana Eunilmoa.

¹²Kava novol vena hona hutel tombaiva Silasnapopol. Kava lihavna, osva himba pina mongawa Kristusnindrini. Kava novol vena, osm yem peishawolalm, luhunilm meisram. Kava undva vrinvna, ishunilm yemba, osm moamba honamba tanam wavrava Sesoanamba. Keknam avm no wavranaoa. ¹³Honamba Kristusnindva Bapilondava pieminna yemba sehmoa. Hembra kikih vewol vina, os men yem. Makva kana ombolnihilmsna Kristusnindrinita, eva himba yemba sehmoa piprinnata. ¹⁴Engla akivra vevm keknam pevna mongawa Kristusnindmongooa, und vewolalm, nonamoa yimba kusovrava sembayangduvmerava. Undwonam ao yem indkumbim, henoi ye ten avm Kristusinda. Doata Pitana moamba.